

Ɔwulɔ Nyɔɔsiá Paulo Lɔwanlɔn Sísí
Korintofɔ

¹ Mí Paulo ání ina Bulu apétó nabwé Kristo Yesu sumbí ɔyɔpɔ mva anɔ pío Timoteo dé ɔwulɔ ánfɔ wanlɔn.

Anɔdé mú wanlɔn sísí Bulu ɔpasua ání ɔbu Korinto wúlutɔ pɔ Bulu ahá ání bɔbɔ Akaia ɔsulɔsu fɛ́é.

² Anɔ Sí Bulu mva anɔ Wíe Yesu Kristo bɔgyíi mlɔ buale, abɔha mlɔ iwilwii.

Paulo Bulu Ipánda

³ Mliha akanfɔ Bulu. Mɔgyí anɔ Wíe Yesu Kristo mu Si pɔ mu Bulu. Mɔgyí anɔ Sía otowun anɔ nwe pɔ anɔ Buluá otolwíi anɔ klɔn ɔkpagyíɔkpasu! ⁴ Otolwíi anɔ klɔn anɔ asun wunhe kugyíkɔtɔ, méni anɔ é abétalí pɔ klɔn lwiíhé ámúb anlanyá tsú mu wá ámu lwíi anɔ aba klɔn amú asun wunhetɔ. ⁵ Alɔ ámúb Kristo léhie wun ipian kpɔnkpɔɔnkpɔntɔ, anɔ é anɔdé mú ku wúun amu a, alí kén Bulu ná Kristosu ɔhíé ɔde anɔ klɔn lwíi ní. ⁶ Mú su ní anɔdé ipian wúun a, mlɔ iwilwii pɔ mlɔ nkpahóɔ su anɔdé mú wúun. Tsúfɛ́ Bulu dé anɔ klɔn lwíi, méni anɔ é abólwíi mlɔ klɔn, fówun mlétalí nyá klɔn, tomi wun anɔ ipian ámu odu kén. ⁷ Ifú medé anɔ mlɔ su, tsúfɛ́ anyin ání anɔ mlɔnyɔ dé ipian ámu wúun. Mú su Bulu obólwíi mlɔ klɔn fé anɔ.

⁸ Apíó, ɔbu alá mlébi ání iwɔsun ámúb anɔlówun Asia ɔmátɔ ámu ɔnɔ lehie wá ɔnlɔn. Ilekɔ dɔn anɔ. Ifú lekítá anɔ, aníkí ání abówu kokooko. ⁹ Ɔnɔkwali asún, ɔlɔbwe anɔ fé bahá anɔ lowu ipɔn. Táme alá anumɔɔpɔ anɔ dínká anɔ iwɔsu, mboún Buluá ɔtɔkúsɔa awupúsú, su ɔleba alɔ. ¹⁰ Lélé mú á, ɔlele anɔ tsú lowutɔ. Anɔlahogyi ání obétsiá lé anɔ brégyíbré. ¹¹ Ɔbéle anɔ, tsúfɛ́ mlɔdé mpá bɔ anɔ nwunsu. Inɔ su ahá tsɔtsɔɔtsɔ béda Bulu ipán anɔ nwunsu, tsúfɛ́

alawá awitɔle há anɪ, mpáí á múbú ahá tsɔtsɔɔtsɔ buɔɔbɔ há anɪ á mu sɔ.

Paulo Nnihíé Tse

¹² Abétalí pɔ ibi sí kántó aniaa anɪ klɔn mókúhá anɪ pón anɪ nkpatɔ, títriu ania mlɔnyɔ nátítɔ. Megyí anɪ ɔsɔlɔv anfisɔ nyánsa anilópv anidé anɪ agyómá yɔ, mboún Bulu awitɔle sɔ anulatálí lé iwɔtɔ anidé tógýítɔ bwe ɔnɔkwali sɔ. ¹³⁻¹⁴ Tsúfɛ megyí asún ání mluméetalí kla, nu mú asɪ anitɔwánlín sí sí mli. Ibv mótótá mlumédé mú asɪ nu yi, táme nahogyiá mlóbonu mú asɪ wankláán ekekú. Fówun mli é mlétalí pɔ anɪ tsú iwɪ, fé aliá anɪ é abópv mli tsú iwɪ anɪ Wíe ɔbáke amv.

¹⁵ Mí ansí dun asún ánfisɔ. Mú sɔ nɔbwe agywun ání néba mli wá, ménɪ mlénya oyúla anyɔ. ¹⁶ Múgyí, nót sɔn mli wá yó Makedonia. Ní neyínkí é nélatsɔn mli wá; fówun mlétalí sí mí ɔkpa, néyinkí ba Yudea ɔmátɔ. ¹⁷ Mléfité mliaa, ntogyi sɔ nalátse mí agywun. Ntéé nabwé fé ɔyítɔ ahá á múbú buteblí bɛɛ, “Ee” latsé amú ɔnɔ bɛɛ “Ó-o” amɔtɔ ɔkɔ? ¹⁸ Alí á múbú Bulu bu ɔnɔkwali, ɔtamawá afunu amv a, alí mí “Ee” igyi mí “Ee” ní. ¹⁹ Tsúfɛ Bulu mu Bi Yesu Kristo amv tamablí ɔbéé “Ee” latsé mú ɔbéé “Ó-o.” Mu mú á, “Ee” kóún ototsúlá. Mu iwɪ asún ɔkan mía Silas pɔ Timoteo aniléda súná mli ní. ²⁰ Tsúfɛ mutót súlá “Ee” há Bulu nihíé kugyíku itɛba mótɔ. Mú sɔ akánfú Bulu tá á, aniteblí aniaa, “Amen!” ni. ²¹ Bulu téhá ania mlɔnyɔ anitetálí lí kínkíínkín ania Kristonyɔ ikɔlebweɔ. Múgyí ɔhá ání ɔlɛda anɪ ofúli. ²² Mu kén lópv ɔɔɛ Wankíhé amv wá anɪ klɔntɔ, póbíe anɪ nsɔ; isuna ání mubú anɪ, ɔbóbwe tótá ɔlɛɛ há anɪ.

²³ Bulu ɔbíti mí isɔ ní megyí ɔnɔkwali nde mli bláa. Aliá mméeba bowun tsitsa kuku blí tsú mli iwɪ sɔ mmetrá bɔtsɔn inɔ. ²⁴ Anumédékléá ibóbwe fé anidé mli hie aliá mlópv mli hógýi yó agyómá. Mboún aliá ansí bégyi mli

só ania mlinyo anidé agyómá yó. Aniyin ání mli hógýi su mlilí kínkínkín dodo.

2

¹ Mú su nabwé agywun ání mméetrá ba bowa mli awirehó. ² Tsúfé ní nebá bowa mli awirehó á, ma óbéha ansí bégýi mi dun mli ámúbú nawá awirehó ámu? ³ Mú só nòwanlín ówulú gyankpapu amu sísí mli ní. Fówun ní nebá á, mli ámúbú mléha ansí bégýi mi ámu mliméela há awirehó mboún ikita mí. Tsúfé mí ansí dun mli féesú ání ní ansí de mí gyí a, mli é ansí bégýi mli. ⁴ Megýi ansigyí nòpòwánlín ówulú ámu. Asún ihíé de mí háan, ndesú asa nòwanlín mú! Táme megýi alá néha mlégýi awirehó su nòwanlín mú. Mboún alá mlébi ání ntehié dwé mli su.

Lakpansikíé

⁵ Óhá ámúbú ólòpò asún ba ópasua ámutó ámu mókúpú ólala gyi mi. Ní bée bukú mú á, ópasua ámu fée alapú asún gyí. (Mmedékléa nódun mú blí.) ⁶ Tsubití ámúbú mli óduduo mlilébití mu amu itsó mu. ⁷ Ulafun ání mlésikíé mu, yíá mu klun nya. Fówun asún móódun mu, iwí móowu mu. ⁸ Mú su nokókóli mli, mlile suna mu ání mlitráa mlíbu mu iwí ódwe. ⁹ Ndekléa nébi ní mlitegyi mí asún ámu féesú. Mú su nòwanlín ówulú ámu ni. ¹⁰ Ní mlesikíé óku á, mí é nasíkíé mu. Ní nesíkíé mu é á, mli sù nasíkíé mu Kristo idátó, ní ilehián ni, ¹¹ méní Óbunsám oméenya aní iwí ókpa, tsúfé aniyin ikpa ání ótòtsun músú fée.

Paulo Klun Médi Mu Asi

¹² Bréá neba Kristo asun wankláan ámu ókan ódakpá Troa wúlutó á, nowun ání aní Wíe lafínkí ókpa há mí. ¹³ Táme mí klun médi mí asi, tsúfé mmòtu mí pío Tito unu. Mú su neklá amú ká tson yó Makedonia nsántó.

Isugyí Kristo Idátó

¹⁴ Táme nde Bulu ipán da ání Kristo isugyí sv alabwé ani ndoun, alakpá ani buo iwí, anidé mu isugyí amu nke gyí. Ní ayó ótínegyíótíné a, ótòtsun anisv bláa ahá ámu Kristo asv wankláán ámu, fé aliá ofobí fánfán tówá ofan yó tsútsúútsú. ¹⁵ Lélé mú á, Kristo gyí ato tóhé, anigyí mú ofan ání idekvsó há Bulu, há ahá ání bude nkpa nya pú amúá budefwí féé. ¹⁶ Itobon ahá ání budefwí, kpá amú ya lowutò, itówá ahá ání ode amú nkpa hóo ofan, kpá amú ya nkpatò. Ma mee lófun ha gyoma ánfí odu yó? Óhaa má unv. ¹⁷ Aní mú anumégyí fé ahá ódvdvdá bude Bulu asv́n ámu fe púkle kóba. Íniá Bulu lówa aní sv á, aniteblí mú ónòkwalisv fé Kristo asúmbe ání bulí Bulu ansító.

3

Bulu Ntam Pòpwe Asúmpú

¹ Asv́n ánfí anidéblí ánfí itráa desuná ání anidé iwí kanfó súná mli lóó? Ntée ilehián ání abópv aní adánsie nwulú bá mli, ntée abóhò mú tsú mli wá fé aliá akv butòbwé? ² Èkekeke! Mli onutó tsiátó gyí adánsie nwulúá bawánlín dínká aní klvnsv, óhagyíóha dé mú wúun kla, púbí ání anidé agyómá wankláán yó. ³ Mligyí ówulúá Kristo lówanlín, ivòtsun anisv ba. Táme megyí oyípe ólòpvwánlín mú, Bulu ókiankpavv amv Óhé ólòpvwánlín mú. Megyí abwi pétéplé anyòsv* é ólòwanlín mú dínká, mbóun anyánkpúsa klvnsv.

⁴ Aniv ókpa blí alí, tsúfé Kristo sv aní ansí dín Bulusv. ⁵ Anyin ání anumófun ání abétalí bwé tòtò aní onutó iwísv. Bulu sù anilófun ha tógyító bwe. ⁶ Móláhá anilabwé mv ntam pòpwe amv asúmpú. Megyí ibi Bulu lópvwánlín mú mú, mbóun Óhe Wankíhé amv. Tsúfé mbla wanlínhé amv

* 3:3 Abwi pétéplé anyò ámúú Bulu lówanlín mv Mbla dú dínká músú há Mose amv.

itópú lowu ba, táme Ɖɛ Wankíhé klé amv mǔ itópú nkpa ba.

⁷ Mbla dada amúb Bulu lówanlín dínká abwi anyɔsv ámv ulɔpv lowu ba. Táme mǔ numnyam léha Mose ansító lehie wankí asa ɔlɔpvba Israelfō. Bréá numnyam amv ɔnó ide asibá ó á, bumetalí kɪ mv ansító. ⁸ Íniá mbla wanlínhé amv lénya numnyam alí á, mǔmǔ Ɖɛ Wankíhé amv gymagyihe numnyam ibéhie dvn mǔ! ⁹ Mbla wanlínhé amúb itehá antegyí ipón ámv kóráá ibv numnyam. Mǔmǔ nkálí Ɖɛ Wankíhé gymagyihe amúb ihíé bv numnyam dvn mǔ ámv ibóbwe? Tsúfé itehá antegyí asv Bulu ansító! ¹⁰ Mǔmǔ idesuná ání Bulu mbla dada amv itráa ma numnyam kóráá. Pópwe anfi numnyam lagyi mǔsǔ. ¹¹ Tsúfé ní Mbla dada amúb imetsiá wá ɔpá ámv ibv numnyam alí á, mǔmǔ pópwe anfi ibétsiá bré féé anfi klé ibéhie dvn mǔ!

¹² Aní ansí dvn ntam pɔpvwe anfisv. Mǔ sv anibv ɔkpa tói faan. ¹³ Animégyí fé Mose ání oletsíá pǔ tati bun nwun, méni Israelfō bumóowun mv ansító wankí, bréá mǔ ɔnó ide asibá. ¹⁴ Táme mǔ óó á, Bulu léha amúb kluntǔ lówa odwin bɔfvn nde. Mǔ sv ní bude Bulu mbla dada amv kláa amúb ofiakpa a, butamanú mǔ así, tsúfé tati ámv létin amúb agywun. Tǔtǔ méetalí bwíí tati ámv lé amúb agywunsv, nkétí amúa Kristo babwé kole. ¹⁵ Bǔtv nde kóráá ní bude Mose mbla ámv kláa a, tati ámv itráa bun amúb agywunsv. Mǔ sv butamanú mǔ así. ¹⁶ Táme ní ɔha onyá dámlí kluntǔ ba aní Wíe wá pé, Kristo labwíí tati ámv lé mv agywunsv. ¹⁷ Aní Wíe amúb asún anfi idetói tsú mv iwí ámv gyí Ɖɛ Wankíhé amv nɪ. Ɖtínegyíɔtínéá Ɖɛ ámv ibv a, iwígyí tétsiá unv. ¹⁸ Aní Wíe dé tati ámv bwíí lé aní féé ansító. Mǔ sv anidé mv numnyam amv le súná ní. Mv Ɖɛ ámv lahá anidé mv lían, tsúfé mv numnyam amv itráa dewankí anitǔ tsía.

4

Ἰὸτὸς Siadie

¹ Bulu lāwun anī nwe pú agyómá áñfi wá anī ibitō. Mú sv abato tamawú anī. ² Anilakíná tóá ibu péli pú oklúntō ató fée. Animédé ahá mlé, animédé Bulu asún ámv é damlí bun. Mboún anidé ònòkwali amv onutó blí púlé iwī súná ahá fée, iwanki amú alíá anigyí Bulu ansító. ³ Ní tòkv ibun asun wanklāán ámvú anidéblí ámvsv kórāá á, ahá ámvú budéfwī ámv nkule ibun há. ⁴ Òbvnsám gyí òyí laláhe anfisv ogyípó. Múlápó ató tin ahá áñfi butamahō Bulu gyi anfi ansíbi. Mú sù bumedé asun wanklāán ámvú igyi wanki amv asī nu ní. Wanki amv gyí Kristo. Múléhīe lian Bulu numnyam ni. ⁵ Tsúfé animéná animédé anī onutó iwī asún òkan da. Yesu Kristo iwī asún òkan anidéda aniaa, mvgyí anī Wíe. Tóá anteblí tsú anī iwī gyí, Yesu sv anilabwé mli asúmpó. ⁶ Tsúfé Bulu ámvú òleblí òbéé, “Wanki idáli tsu oklúntō!” ámv kén lahá mv wanki amv idewankí anī klvntō. Ilahá anilabí áñí mv numnyam amv idewankí Yesu Kristo ansító.

⁷ Táme anigyí fé nló pwehé áñí siadie bu mótó. Siadie ámv gyí wanki mba túmi áñfi idewankí anī klvntō. Idesuná áñí túmi kṛonkṛonkṛonti áñfi imotsú anī, Bulu wá itsú. ⁸ Bvde anī háan òkpagyíòkpasv, táme bvmòkótálí sá anī tin. Iwī de anī klí, táme imòkókṛon anī. ⁹ Bvdun anisv, táme Bulu mókúsí anī há. Bvtefin anī dá, táme Bulu sv animókúwú. ¹⁰ Anilatsúlá ide anī òyvlóv anfi ipian brégyíbré, anidéwu fé Yesu, ménī mv nkpa ámv ibéln òwan anitō. ¹¹ Yesu súm sv anī nkpa atsiápó anfi anitefia lowu brégyíbré. Alíá ibóbwe mv nkpa béln òwan anī òyvlóv anfi idewu áñfitō sv. ¹² Inī désuná áñí lowu dé anī laláa, mli é mlidé nkpa áñí itamatá nya.

¹³ Táme anībv mósó anidé Bulu asún ámv òkan da. Tsúfé anilóhō mv gyi fé alíá Israel ilv òwapó ámv lówanlín wá Bulu asún ámvto òbéé, “Nòhō Bulu gyi. Múlahá sù nde mú

ɔkan da ní.” ¹⁴ Anyin ání alí ámbú Bulu lóksúa aní Wíe Yesu tsú afúlito ámu a, alí kén ɔbóksúa aní, ɔbékpa ania mlínyo fée ba mu iwí wá ní. ¹⁵ Íni fée bówá labi há mli, méni ní Bulu híé ɔde awitɔle wa, kpá ahá ɔdudwo ba Kristo wá á, béhie dá mu ipán, wá mu numnyam.

Hógyi Potsiá

¹⁶ Mú su abato tamawú aní. Ibu mótóá aní ɔyulúv anfi idewu mó, táme Bulu dé aní ɔkláa ɔwunlín wa ekek-egyíeke. ¹⁷ Tsúfē iwɔsin kpalobí anfi anidewúun séi anfi ibéha abénya numnyam kpɔnkpɔnkpɔntiá itamatá, idun iwɔsin anfi. ¹⁸ Mú su animédé iwɔsin anfi anidewúun anfi bu. Múá nyankpusa ansibi tamawun ɔkra anidékí. Tsúfē iwɔsin anfi ibéba bɔtsun. Ansigyí ámbú ibu ɔma, ibétsiá bré fée ámu ɔkra anidékí.

5

¹ Aní ɔyulúv anfi igyi fé kantankpa ání anitsie mótó. Ní bobwíe mó á, Bulu ɔbéha aní obu bámbá ɔsúsú. Mómú á, megyí nyankpusa léyi mó. Mu onutó léyi mó, imóobwie ekekeke. ² Tsúfē séi kúráá ide aní ipian ɔsulúsv-ɔyulúv anfito. Anihíe anigyó ekeá ɔbópu aní ɔsúsú-ɔyulúv wá aní fé atadi. ³ Múmú animóɔbwe fé ɔhéá uma ɔyulúv, aniná yayá. ⁴ Ide aní ipian, anidékumí bré anfi anitráa anibu aní ɔyulúv dada anfito. Megyí beɛ anidékléá awú, adali ɔyulúv anfito. Mboún anidékléá Bulu ɔwáa aní ɔsúsú klé ámbú itamawú pló ámu, méni ibégyi mó anfi itowú pló áfisv. ⁵ Bulu onutó léla aní yái há mó, ɔlɔpu ɔhe Wankíhé amv wá anito. Múgyi ibwiá ɔledunká músú ní.

⁶ Mú su anitowá klun brégyíbré. Ibu mótóá bré anfi anibu ɔsulúsv-ɔyulúv anfito á, anibu ifó aní Wíe wá. ⁷ Íni su hógyi anlapó anitsie nkpa, megyí tóá ansibi dewúun. ⁸ Ee! Anihíe anidé klun wa, tsúfē tóá anihíe anidédunká gyi abówa ifó ɔsulúsv-ɔyulúv anfi wá, ayetsiá aní Wíe wá.

⁹ Mú sv ní aníbu əsulósv nfi o, ətine bambá o, tóá idun aní klunsv bré fée gyí, abóbwe tóá ibégyi aní Wíe ansí. ¹⁰ Tsúfē aní fée abéyélu Kristo ansító, obégyi anító okugyíəku asón, ká mv ɪkə aní əsulósv-əyulúv anfi bwéhé ənó. Yilé igyi o, lalahé igyi o.

Bulu Onyawíele

¹¹ Anihíe aniyin ání ilehián ání abénya aní Wíe ifú. Mú sv anidétóí kplá ahá aníaa, amú é bunyáa mv ifú. Bulu híe oyin aní. Nahogyi ání mli é mliyin aní mli klvntə. ¹² Megyí iwí anitráa anidétso súná mli. Mboún anidé mli əkpa suná, méní mlótsu iwí aní sv. Fówun ní ahá bude iwí tsu tóá əha təpú ansíbi wun sv, imegyí tóá ɪbu əha klvntə sv á, mlénýa kv bláa amú. ¹³ Tsúfē ní beə aní nwun layíntá kúráá á, Bulu asón igyi. Táme ní beə aní ansító da mú á, ida ha mli. ¹⁴ Ədwe ámvú Kristo bu ha aní ámv dé aní kpa, tsúfē anulanú iwiasí ání mv nkule lówu há ahá fée. Mú sv mv aha fée bawú. ¹⁵ Olowu há ahá fée lélé, méní ahá ání bénya nkpa pəpwe amv bvmétrá tsiá nkpa alíá budeklé. Mboún bétsiá nkpa há Kristo amúv olowu, Bulu lókusúa mv há amú ámv.

¹⁶ Íni sv anitráa anuméde əhaa kú fé alíá əyító ahá buteki mv. ɪbu mútótá bré ámv anilétsiá kv Kristo fé alíá əyító ahá buteki mv, táme anitráa anuméde mv kú alí. ¹⁷ Mú sv ní əha mv Kristo bəbwé ikule a, alabwé əha pəpwe. Mv tsiátó dada amv fée ɪlatsun. Mv tsiátó labwé pəpwe! ¹⁸ Nkpa pəpwe anfi itsú Bulu wá. Mvlótsun Kristosv bwé aní anfi anigyí mv alupú anfi mv anyawíe. Alapú agyómá anfi wá aní ɪbitə, əbéə alée aha bambá é anyawíe ha mv. ¹⁹ Tsúfē Bulu lótsun Kristosv əde əyító ahá damlí bwé mv anyawíe. Ətráa əmedé amú lakpan iwí akúnta bu há amú. Íni ələpəwá aní ɪbitə əbéə, abláa ahá ni.

²⁰ Kristo atsiámi anigyí, Bulu déttóí tsən anísv há mli. Mú sv anulí Kristo əlíkpá anidé mli kokóli aníaa, “Mliha

Bulu obwe mli mu anyawíe!” ²¹ Tsúfē Kristo móbwe lakpan kuku! Táme Bulu lópu mu bó afōdie aní lakpan su, méni obótsun ania monyo ikulebwesu tsú aní aní aní asún da okpa mu ansító.

6

¹ Ania Bulunyo anidé agyómá yo. Mú su anidé mli kokóli aniaa, mlumáha Bulu awitole amúú mlilanyá ámu ibwe kpaali. ² Tsúfē Bulu lébli mu asun wanlínhé amotō obéé, “Bréá mí bré lōfon aní nówun ahá nwe a, nonu mli ome.

Mí nkpa ohóke amu ulōfon é á, negyi mli buale.”

Mlunu! Bré ámu lāfon a. Nde gyí mli nkpa ohóke amu ni!

³ Animédékléá abétin ohaa aní Wíe wá ba okpa, méni ohaa méenya asvansu blí tsú aní agyómá ánfí iwí. ⁴ Mboún aní bwehé fēétó a, anitelé súná aní Bulu asúmbi anigyí onokwalisu. Anitotomi aní iwiasin, aní ikplán pú aní asun wunhe kugyíku étó. ⁵ Bepití aní ató, wá aní obu, bekpa bun anisu dá aní. Anilóyo agyómá aní idun aní. Nkekú anitamadídi, nkekú é anitetsiá akún. ⁶ Anilótsun aní tsiátósu lé súná aní ifin kuku má aní iwí. Aniyin asún, anitenyá iklon. Anibu awitole, Oje Wankíhé amu tsie anitō. Anitehíé dwé ahá é tsú aní klontō. ⁷ Anitedá Bulu asún ámu okan onokwalisu pú Bulu túmitō. Yilébwe gyí isá-akotóá anidépukó ahá, anidéputin aní iwí é. ⁸ Aku butobú aní, aku é butósúpa aní. Aku butekánfú aní, aku é butakpóí aní. Aní asún da okpa, táme bude aní bu afunupu. ⁹ Fé anumégýí tōtō ahá ansító, táme ahá anigyí. Fowun aní fēe anidéwu ní, táme kí, anibu nkpa. Butesian aní mō, táme anitedáli mótó. ¹⁰ Anibu iwiasintō, táme Kristo su anibu ansigyító. Ahiánfō anigyí, táme anulahá ahá bamlí iwí anyapó. Animá tōtō, táme anibu tógyító Kristo su.

¹¹ Korintofō! Antehíé nyá mli iwí ansigyí, lé iwitō bláa mli asún. ¹² Anitamakólá iwí mlisu, táme mli mú mlidé

ιω κολά ανισυ. ¹³ Nδε mli asún bláa fé mí onutó abí. Mli é mlumápu asvansu ηάίν aní.

Θμάτόφο Ρυγι Mba

¹⁴ Mlia θμάτόφο mlumágyi mba. Nkáli yilé múa lalahe βetalí tsíá tsukule? Nkáli wanki múa oklún é bóbwe kule? ¹⁵ Kristo mua θbunsám* βetalí bwé agywun kule? Ekekeke! Nkáli ohógyipu mua θhá aní θma hógyi bóbwe kule? ¹⁶ Nkáli bótswe θkpi Bulu θswékpa? Tsúfé anígyí Bulu θkiankparu amu θswékpa ni. Igyi fé alía bōwanlín wá Bulu asún ámutō beε,
“Bulu θbéε, ‘Nétsiá mí ahátō,
mía amúnyō abénatí.

Nóbwe amú Bulu,
amú é bóbwe mí ahá.’ ”

¹⁷ Bōwanlín wá Bulu asún ámutō é beε,
“Aní Wíε Bulu θbéε,
‘Mludali amótō, amlumain ιω le amúsó.’ ”
Betrá wanlín wá Bulu asún ámutō beε,
“Mlumáwa ιbi lalahetō,
mí anho mli.”

¹⁸ Betrá wanlín wá Bulu asún ámutō beε,
“Bulu θbéε, ‘Nóbwe mli Sí,
mli é mlóbwe mí abí.’
Alí aní Wíε Otúmípu déblí ní.”

7

¹ Mí apió adwepó, Bulu lahíε ntobía igyi alí yái aní. Mú su mliha afwi ιbi le tógyítōá ιbókpaí aní θyulōv pú aní θkláa féétō. Mliha anya Bulu ifú, ménι ιbéha aní ιωι βétin, ifin kuku méétrá tsíá aní ιωι.

Paulo Ansigyí

² Kókoli, mlumákolá ιωι ανισυ! Anumókópō lalahe gyi θhaa. Anumókóyintá θhaa, anumókúsísi θhaa é. ³ Megyí

* ^{6:15} Paulo létι θbunsám θbéε, ‘Belial.’

upón nde mli ha sù nde asún ánfí blí. Tsúfē nablí bōtsun mbéé, anitekile mli asún. Lowutō o, nkpatō o, anuméetan mliṣu ekekeεεε. ⁴ Ntetáí bla mli mí kluntō asún, nde iwí é tsu mliṣu wankláán. Aní ipian fée ōma a, mlilawá mí atetō-ōnlun. Ansigí kṛōnkṛōnti ku labólá mí kluntō.

⁵ Tsúfē bréá anulówie Makedonia a, anuménya ōkpa dá ōkṛónú. Atsun nfi asún, ayínkí nfi itré. Mú sv ifú letsiá aní ayetō. ⁶ Táme Buluá otolwíí ahá ámúb iwí lawú amó uklun amu lékpa Tito ba aní, púlwií aní uklun. ⁷ Megyí mu íbá amu nkule léha uklun lólwií aní, mboún asún aní ōlṛṛṛtsúa unu ba é. Ōlebláa aní ōbéε, mlihié mlidékléá mlówun mi. Alíá asún ámu lahan mli, mlilanú iwiasí aní mlímébi bwé pú alíá mlilahíé tsúlá dínká mí klésv, sv ansí letrá gyi mi tsía.

⁸ Tsúfē ní mí ōwulú ámūtō asún lehan mli kúrää á, mí mú umehan mi. Ibu mútáá uléhan mi bré kutō, tsúfē nowun aní uléha awirehō lékitá mli kpalobí. ⁹ Ansí de mí gyí séi. Megyí alíá ulōwa mli awirehō sv. Mboún alíá awirehōsú amu ilahá mliladámli kluntō sv. Tsúfē mli awirehōsú anfi odu Bulu tekile ni. Mú sv mí asún ámu imeyintá tōtō tsú mli iwí. ¹⁰ Tsúfē awirehōsúá igyi Bulu apé tṛpú kluntōdamlí bá. Itehá anitenyá nkpa. Mú odu bu ōsun, táme uma ōsun. Ōyítō awirehōsú mú á, lowu itṛpúba. ¹¹ Mliki tóá awirehōsúá igyi Bulu apé latí há mli! Ilahá mlilatsú iku lé asún ámūtō, mlidésuná aní mli asún da ōkpa sv ōbló é de mli. Ilatíí mli opúni, ilahá mlihié mlidékléá mlówun mi, mlilatsúlá dínká mí klésv. Mlihié mlidédunká aní mlébití lalahé ōwepó ámu iṣu. Lélé, mlilalé súná aní mlímégyi pón asún ánfítō.

¹² Nōwanlín ōwulú sísí mli, táme megyí ahá anfi sv. Megyí ōhá ámúb ōlōbwe ulá, ntée ōhá ámúb ōlṛṛṛ ulá gyí mu amu sv. Alíá néle súná mli Bulu ansítō aní mlilatsúlá dínká mí klésv mboún sv. ¹³ Iní lahié wá aní atetō-ōnlun.

Múá idun kúrää á, ansí legyi aní, bréá anulówun aní mli

fée mlilahá ansí de Tito gyí, tsúfē mlilahá iklun ladí mu asu. ¹⁴ Ní nekanfó mli mu ansító kúráá á, mlu méha péli mekitá mí. Alí ámúú asún ámúú anilébláa mli ámu fée igyi ɔnokwalí amu a, alí kanfó ámúú nekanfó mli mu ansító ámu é laba móto ní. ¹⁵ Ní Tito ɔkáín alíá mli fée mliteyaa asu há mu, hɔ mu asun blíhé, pú alíá mletenyá ifú kpínkí mu ansító á, ɔtetráa nya mli iwí ɔdwe tsía. ¹⁶ Ansí ihíé de mí gyí aní nétalí pú ansí dínká mli su ɔkpagyíokpasu.

8

Akristofō Atókie

¹ Apíó, anidékléá mlibú awitoleá Bulu lawá há ɔpasua ámúú bubu Makedonia ɔmátó ámu. ² Íniá bubu ipian múa asun wunhe tsɔtsɔtsɔto kúráá á, bɔpu amú ohian futútúútú lé amú awitole kpɔnkpɔɔnkpɔnti súná ansigyísú tsun amú atokiehétó. ³ Néblí mbée, bekie ató dun alíá bétalí kúráá, tsú amú klwnto. ⁴ Betsiá kólí aní ɔkpa bée, ahá amú é abunya ɔkpa wa awitole ha Bulu ahá aní bubu Yerusalem. Fówun amú é amú ibi bówie osum agyómá ánfító. ⁵ Bɔbwe dun alíá anilósusúu. Gyankpawu a, besi amú iwí há aní Wíé, belasí amú iwí há aní Bulu apétó. ⁶ Mú su anulahá Tito amúú olegyankpá beha mlilówa nsi ámu aniaa, ɔtráa yinki beha amlíwa nsi mɔ mli awitole agyómá ámu ɔnó wankláán. ⁷ Mlilafun ɔkpagyíokpasu, tsúfē mlihié mlibu hógyi, mliyin tóí, mlilétun ansí. Tɔto tamakpɔn mli, mlitehíé dwé aní é. Ndekléá mlibóo mbódí awitole agyómá ánfí étó dun ɔhagyíoha.

⁸ Mmedé mli hie mbée, mlibwée mó. Mboún ndepu mli ɔdwe kápú akvá budeprú aní amú é bóbvá. ⁹ Tsúfē mliyin alíá aní Wíé Yesu Kristo lódwe ahá, wá awitole. Iwí onyapú ogyi teki, táme aní su ɔlɔbwe iwí ohíáni, méni abótsun mu ohian ámusu bwé iwí anyapú.

¹⁰ Mí agywun gyí, ní mlómó agyómá ámúú mliléfi asu ofíku ámu ònó á, íbówa labi há mli. Tsúfé mligyí òpasua gyankpapu ání mlilóbwe agywun ámu, mli kén léfi mú asu.

¹¹ Mliwuna bwe mú mō ònó. Mlile ikluntō bwe mú, fé aliá mliléfi mú asu. Mlikie mú mli òwunlín ònó, méni íbékanaá agywun ámúú mlilóbwe ámu. ¹² Ní ihíe igyi mli apéá mléha á, mlikie tóá mlibv. Mútegyi Bulu ansí, megyí múá mli má.

¹³ Megyí bæe, anidékléá abéha iwí bólwií aku, iwí ikli mli mú; mbóun aliá iwí bólwií mlia amúnyo féé kékée.

¹⁴ Séi mlibv ató tsòtsòá mlétalí póbúa amú. Mú mú ní iwá alé há amú, iwí leklí mli é á, amú é bétalí búa mli, méni mlia amúnyo féé mlénya kékée. ¹⁵ Mlikaun ání Bulu asun wanlínhé amu lébli òbéé, “Òhá ámúú òlekpa tsòtsòtsò ámu ménya mú òvbi. Òhá ámúú òlekpa kpalobí ámu é klé lōfun mu.”

Tito Mva Mu Aba

¹⁶ Adá Bulu ipán ání alahá Tito é latsúlá dínká mli klésu fé mí. ¹⁷ Bréá anilówa mu aniaa òbá mli wá á, olotsulá. Mu onutó óó, íbō mu òdwe ání òbétrá ba iwu. ¹⁸ Anidé mva opió òku wa sísi mli. Òpasua ámu féé bude mu kanfú, asun wankláán ámu òkan da sv. ¹⁹ Makedonia òpasua ámu féé léle mu ání ania mūnyo anáti ki, aho atokiehé ámu ya Yerusalem. Anidé ató ánfí bwe pówá aní Wíe numnyam, méni íbósuná ání aní onutó latsú dínká iwísw ání abóbwe mú.

²⁰ Anidé aní iwí kú wankláán, méni òhaa méele aní ulá, tsú aliá anilópw anidé atokiehé ámvsu kú. ²¹ Tóá anidésusúu gyí, aliá abóbwe múá ida òkpa Bulu mva anyánpósa féé ansító.

²² Íni sv anilapú aní apió ámvtō òku mántá Tito anású. Anilasō mu ki, anilawun ání òhíe òbv nsi. Alahō mli gyi séi. Mú sv òhíe òdekléá òbétsa aní agyómá ámu yō. ²³ Ní òku léfité mvsu á, mlibla mu mliaa, mía mūnyo dé agyómá yō púsúm mli. Makedonia òpasua lówa apió atráhe amúú mva

amónyɔ bebá ámu. Íni désuná ání Kristo bude numnyam wa. ²⁴Mó su mlile mli ɔdwe suna amó. Isuna ɔpasua ámu fée ání mli su anibu ɔkpa tsú iwí.

9

*Akristofó*á Buma Tɔtɔ Bvá

¹ Imehián ání nówanlín mli ɔwulú tsú alíá mlidé Bulu ahá ání bubu Yerusalem bvá iwí. ² Tsúfée nyin ání mlíhié mlidékléá mlóbvá amó. Nagyi mli iwí adánsie súná amó mbée, tsú ofíku ɔpá Akristofóá bubu Akaia ɔsolúsu beda iwísu yáí ání bóbvá. Mli nsiwa lahá ogyá kv lawíé amó ɔdɔdɔtɔ. Mó su amó é bafi mú asi. ³ Táme nde apíó ánfí wa sísí mli, isuna ání megyí kpaali negyi mli iwí adánsie súná amó. Mlída iwísu, fé alíá nebláa mli yáí, amlíka mli tswítswí fée. ⁴ Tsúfée ní Makedonia Akristofó ámutɔ aku bobuo mí ba íw, bowun ání mlímɔkúdá iwísu fé alíá nebláa amó á, abósupáa amó ansító, táme mlósupáa dvn mí. ⁵ Mó su nabwé agywun ání néha Tito mua mu aba ámu abugyankpa ba mli wá, íha amlídunka tóá mlíléhie ání mléha yáí. Táme mliha mó tsú mli kluntɔ, megyí ɔhié igyi.

⁶ Mlíkaun ání ɔhá ání odú kpalobí á, kpalobí ɔtɔkpótí, táme ɔhá ání odú tsɔtsɔ tɔkpótí tsɔtsɔ. ⁷ Mlíto okugyíɔku ɔháa múa ɔbétalí tsu mu kluntɔ. Imábwe ɔhié, tsúfée ɔhá ání ɔtɔpú ɔdwe kíé ató asún Bulu tekle. ⁸ Bulu téhá mli tóá mlídehián brégyíbré, dvn alá ilehián mli. Mó su mlénya tóá ide mli hián brégyíbré. Ibófun mli sian, mlópubwé yilé há aha bambá. ⁹ Fé alíá bówanlín wá Bulu asún ámutɔ beɛ, “Bulu ɔha telé iwíto kíé ahiánfó ató.

Mu yilébwe tamatá.”

¹⁰ Bulu téhá adɔtɔpɔ ató-abí butodú, ɔtehá ahá atogyihe. Mlígyí fé amó. ɔbéha mli ató-abíá mlópu íku kíé ahá, atogyihe tsɔtsɔtsɔ bédalı tsu mli yilébwe ámutɔ. ¹¹ ɔbéhie

yúlá mli okpagyíokpasu, méni mlówa awitole há ahá bré-gyíbré. Íni ibéha ahá ámu béda Bulu ipán, ató ámúó mli lapútsun anisu há amó ámu su. ¹² Tsúfé atoku anyo obédali tsu mli ato hahé ánfito. Megyí ató ámúó mli lapúhá Bulu ahá ámúó ató de amó hián, bubu Yerusalem amu nkule, mboún ibéha ahá tsotsotsotso béhie dá Bulu ipán. ¹³ Tsúfé ní mlehá amó á, ibéha békanfú Bulu. Ibósuná ání lélé mlidé Kristo asun wankláán ámúó mli lóhō amusu gyí, mlidé awitole é wa há amó aha bambá. ¹⁴ Béhie káin mli su, bó mpái há mli, tsú awitole kponkponu ámúó Bulu lapúhá mli ámu su. ¹⁵ Adá Bulu ipán há mu atokiehé ánfi idun blí ánfi!

10

Paulo Gyumagyihē Onóle

¹ Ibo mótóá mli to aku mli teblí mli aa, ní mbu mli wá á, mí asún lolwií, táme ntowánlín mí nwuló túmisu. Táme mí Paulo nde mli kokóli mbéé, mli pókí aliá Kristo asún lolwií, oléba iwiasí. ² Mli to aku bu deblí beé, mí bwehé lahan oyító ahá. Mú su ní netrá ba unu á, nawun ání ilehián ání mí ansító bówa onlun. Kókoli, mli máha ampu tsiátó anfi odu ba unu. ³ Ibo mótóá oyí ánfito anibu, táme megyí oyí anfito agywun anidépukó isá. ⁴⁻⁵ Megyí oyító akotó anidépukó. Bulu akotóá ibu túmi anidépúbwíé okpikplikpa kugyíkuvá itokúsú líí Bulusu. Anitópúyíntá afunu asún kugyíkuvá ahá butópútsú iwí, itehá amó butamabí Bulu. Anitópúdámli agywun laláhe kugyíku, há itobú Kristo. ⁶ Ní mli aha tráhe amu mli lapú iwí há Kristo, mlidé mu asónsú gyí a, abébití ahá ámúó bu de asuto-onlun wa ámu é asu.

⁷ Mli ki onokwali ámúó ida mli ansító ámu. Ní mlidékúíá Kristo bó mli á, múmú mli ki mú wankláán, amlibi ání mubú aní é. ⁸ Ní nde iwí tsu túmi ámúó aní Wíe lapúhá aní ámu su dubi a, uma mí péli. Tsúfé olópohá aní obéé, apúbua mli amlidan. Megyí obéé, apúyinta mli. ⁹ Imábwe mli fé

nde nwolō wanlín, pówá mli ifú. ¹⁰ Tsúfē aku bee, “Mákpła Paulo. Mu asun wanlínhé bu odwin, ɔtəpóhíé ahá. Táme ní mu onutó ɔbu aní wá á, ololwíí, mu asun blíhé é uma íbáí!” ¹¹ Iwánkí ahá ámu aní asún aní anitəwánlín sísí ahá kén anitəbwé ní anibu amú wá ní.

¹² Lélé mú á, amendi anigyíá abópu iwí kápú ahá ánfí bude iwí kanfú ánfí? Amú wulewule dépu iwí kápú aba, bude ansí pudínká abasu. Mimlá igyi amú. ¹³ Aní mú animóotsu iwí dáfá, mboún ɔkpa ámúbú Bulu léhie há aní ámu ɔnó abótsu iwí fun. Múgyí agyómá aní anilabwé bətu mli ní. ¹⁴ Anilégyankpá pú Kristo asun wankláán ámu ba mli. Mú su ní anidé mli asún bláa a, animókótóí dáfá. ¹⁵ Animédépu ɔhaa agyómá é tsú iwí. Mboún anidé ɔkpa kí aní mli hógyi bédan. Agyómá ámúbú anidéyo mlitə ámu é íbékłéí tsía. ¹⁶ Mómú abétalí dáfá mlisu yéda asun wankláán ámu ɔkan ɔmá bábábá ésú, méní imóɔbwe fé anilapú ɔtínéá ɔku lagyankpá yó agyómá tsú iwí.

¹⁷ Táme Bulu asun wanlínhé amu léblí ɔbéé, “ɔhagyíɔha aní ɔbéé, mótsu iwí á, ɔpúv tóá aní Wíe labwé tsu iwí.”

¹⁸ Tsúfē ní Bulu ɔkánfú fú gyí asún, iwí kanfú mú kpaali ígyi.

11

Paulo Mva Sumbí Ayɔpú Afunupu

¹ Mlunya klɔn, amlinu mí mimlála kpalobí ánfí así! Kókoli, mlunya klɔn ha m. ² Mmesi mli tswi fé alíá Bulu tamasí mli tswi. Tsúfē mligyí fé obitebíá omeyín oyin, napú mli há oyin ɔkule, ogyi Kristo. ³ Táme alí ámúbú iwó ámu lópu mu alape mlé Hawa amu á, ifú de mí aní ɔku ɔbémlé mli, mli ansí bédinkí ɔnəkwaliwa pú ɔdwe wankíhé amúbú mlibu ha Kristo amusu. ⁴ Tsúfē nyin aní ní ɔku ɔbá beda Yesu bábábá ɔku iwí asún ɔkan súná mli, imegyí ɔmuamúbú aniléda mu iwí asún ɔkan súná mli ámu a, mlókwási hogyi. Ní mlenyá ɔhé bábábá kwá una ɔtsan há

múámúó mlilégyankpá nyá ámu é á, mlóhó mú gyí. Alí kén ní mlonú asun bambá ání una ótsan há múámúó anilébláa mli ámu é á, mlókósí hó mósó gyí ní!

⁵ Mmedéhógyiá ahá ánfí búde iwí tí “Sumbí ayópú akpónkpòntí” ánfí budun mí òkpá òkúkúsv. ⁶ Ní mmeyín tóí kóráá á, nyin asún ání ndeblí. Nahogyiá anilahá asún ánfító ulawánkí mli òkpagyíòkpasv.

⁷ Íniá nòpú iwiasibá pú obú há mli bréá neda Bulu asun wankláán ámu òkan súná mli, mmòhó mli tòtò sv yéé tsitsa nòbwe á? ⁸ Ópasua bámbá ató nòswí, póbá bọyọ agyómá há mli. Mú sv netalí súm mli, mmòhó mli tòtò ní. ⁹ Bréá mbv mli wá, iwí lèklí mí á, mmesi ipian tswí mlitò òkúkúsv. Mboún apíó ámúó botsu Makedonia ba amu léha mí mí atohiánhe. Íni sv mmesi ipian dínká mlitò òkúkúsv, mméesi dínká é. ¹⁰ Íniá ònòkwali nanya ndeblí tsú Kristo iwí mú á, óhaa méetalí ká mí itin òbéé, mmápv asún ánfí tsú iwí Akaia òsulòsv féé. ¹¹ Ntogyi sv? Ntamadwé mli lóó? Èkekeke! Bulu yin ání ntòdwé mli!

¹² Nóbwe mí agyómá fé aliá nde mú bwe dodo. Nóbwe mú pútín amú òkpá, ní búde iwí tsu beé, gyuma kùle ania amúnýò anidébwe. ¹³ Afunupv bogyi. Bapina bwe iwí fé Kristo sumbí ayópú, bvna búde mli mlé. ¹⁴ Táme uma wánwan! Tsúfé Óbunsám kóráá tekí ansí bwé iwí fé Bulu-òbòpú wankíhé! ¹⁵ Mú sv uma wánwan ání mv asúmpú anfi é bapina bwe iwí fé yilé abwepú. Amú ònómò béle amú bwehé kugyíkv òwan.

Paulo Asun Wunhe

¹⁶ Ntráa nde mli bláa mbéé, óhaa mábu mí óha mimláhe. Táme ní mlidé mí bu alí óó á, mlitsv mú alí, mí é anya òkpá tsú iwí kpalobí. ¹⁷ Aní Wíe tamatóí alí, táme nabwé iwí fé óha mimláhe. ¹⁸ Ahá tsòtsòtsò butotsú iwí fé óyítò ahá, sv mí é nótsu iwí. ¹⁹ Ee á, íniá mlihaa atiansipv mligyí óó á, mlitotsúlá há aha mimláhe. ²⁰ Tsúfé ní òkv ópú mli bwé

nkpábi kóráá á, mliotsúlá. Ní òpú mli nyá iwí, ogyi iwíe mliṣu, obú mli tòku odu, òdà mli ṣutò kóráá á, mliotsúlá há mu. ²¹ Mliá mma ansító-ònlun. Ee, natsúlá. Mí klé ma unu.

Táme tógyítáà òku labwé òdeputṣú iwí á, mí é nétalí pú mí klé tsú iwí. (Táme nahogyi ání igyi mimlála.) ²² Ní bēe Hebrifō búgyi á, mí é Hebriyin ngyi. Ní Israelfō é bugyi á, Israelyin mí é ngyi. Ní bēe botsú Abraham abí-anátó a, unu mí é notṣú ní. ²³ Bēe Kristo asúmpú bugyi? Mblí mú mimlásu, ndun amú! Nayírí iwí yó agyómá dūn amú. Nadí obu dūn amú. Badá mí dūn amú. Nesian wu bré tsòtsòtsòtò. ²⁴ Yudafo banwén mí mpli tsé advasa-kwebá (39) tse nu kéké. ²⁵ Romafo é bapítí mí ató tse sa kéké. Bēda mí abwi òtsáwule. Tse sa kéké ntsusu-yibi labun mí, nasin ntsutso ekewóle owító. ²⁶ Mí òkpa tsòtsòtsò tutó á, nafá ntsu akpònkpònti, natsun ogyo atṣwapú ibitò dáli. Natsun òmá bámbásúfō pú aní pì Yudafo fée ibitò dáli. Natsun awúlusu pú adimbísú, nafá òpú. Natsun ahá ámúbù bude amú iwí ti bēe, Akristofō ámu aná fée ibitò dáli. ²⁷ Nayó agyómá kpékplé, ulapíán mí kí. Ntamadídí nkékú. Ntetsiá akón m̀́a òmewóli, ntekli ònó, ntedí atṣali, nátí yayá aná fée. ²⁸ Ínì fée òma a, tóá idun mí klònsu, ntògywún mú iwí ekekegyíeke gyí òpasua ámu fée aléwa. ²⁹ Ma lópon, mmotsu kuku lé mu asúntó? Ma bekpa wá lakpantò, umòwa mí òbló.

³⁰ Ní bēe ntsú iwí á, ntobíá itehá mí hógyi tēba asì nòpṣtṣú iwí. ³¹ Bulu, ogyí aní Wíe Yesu mu Sì, òlekanáa kanfó bré féeftó ámu yin ání mmedé afunu wa. ³² Owíe dehen Areta léha mu òmású òkípú léyete mí Damasko wúlu ònó, òkita mí. ³³ Táme bòpú mí wá lakpátó, lé mí tsun ikwitò, kplí mí yi buntíi ání bòpwe wá wúlu ámu òma, nesrí sí mu.

12

Paulo Atowunhe Pú Mu Ato Lesúnáhé

¹ Ilehían ání nótsu iwɪ, táme tɔtɔtɔ uma iwɪtsútó. Táme mblí atɔ́á nowun pú tɔ́á anɪ Wíe lalé súná mí. ² Nfí dúana (14) ní, bɔwan mɪ ya ɔsúsú saasɪtɔ. (Mí nyankpusa-oyí lɔ́yɔ unv o, mí ɔkláa o, mméetalí bí. Bulu nkule yín.) ³⁻⁴ Fé alíá nakúblí á, bɔwan mɪ ya Paradiso. (Mí nyankpusa-oyí lɔ́yɔ unv o, mí ɔkláa o, mméetalí bí. Bulu nkule yín.) Nonu asón ání uma blító, ɔhaa é má ɔkpa blí mú. ⁵ Nétalí pú itó ámúú nowun amv tsú iwɪ, táme mmóɔpu mí ato bwehé tsú iwɪ. Ntobíá itehá mí ɔwunlín ɔnó teba asɪ ntɔpútsú iwɪ. ⁶ Ní mbée nótsu iwɪ kúráá á, mmóotsu iwɪ fé ɔha mimláhe, tsúfé néblí ɔnɔkwali. Táme mmóɔbwe. Mmedékléá ɔhaa ɔkú mɪ dafa alíá mí tsiátó gyí, ntée asón ámúú nɔpu ba amv.

⁷ Alíá mmóɔpu ntobí ánfɪ ɪbv ifú, ɪbv wánwan, Bulu lalé súná mí ánfɪ tsú iwɪ sv á, ɔlɔpu owu kv wá mí awútó, igyi ɔbunsám-ɔbɔpu. Itedá wɔ mí, ménɪ mmóotsu iwɪ. ⁸ Nakókóli anɪ Wíe Yesu tse sa kéké mbée, ɔlé itó ámu mító. ⁹ Táme asón ání ɔtebláa mɪ brégyíbré gyí, “Mí awɪtɔle pé gyí tɔ́á fehián. Tsúfé ɔhá ání mu ɔwunlín ɔnó laba asɪtɔ mí túmi tɛhíe lun ɔwan.” Ínɪ sv ɪbv mɪ ansigyí ání nɔpu tɔ́á itehá mí ɔwunlín ɔnó teba asɪ tsú iwɪ, ménɪ Kristo túmi ámu ɪbéhie bun mɪsv. ¹⁰ Kristo sv ansí bégyi mɪ brégyíbré. Ní mí ɔwunlín ɔnó ɪba asɪ, buɔe mí sia, mbv ɪkplántɔ, buɔun mɪsú, ntée iwɪ de mí ɔsun, tsúfé ní mí ɔwunlín ɔnó ɪba asɪ á, mú ntelányá ɔwunlín ní.

Korinto ɔpasua lwɪ Asón

¹¹ Nabwé iwɪ fé ɔha mimláhe, táme mlíháhá ɪlaba alɪ. Tekɪ ilehían ání mléblí asun wankláán tsú mí iwɪ. Tsúfé ɪbv mútɔ́á mmegyí tɔtɔ, táme ndun “sumbí ayɔpú akpɔnkpɔntɪ” ánfɪ mú. ¹² Bréá mbv mlɪ wá á, notomi bwé tɔ́á ɪbv wánwan pú osúna múa ofúla ɔtsan-ɔtsan, púsúná mlɪ ání lélé sumbí ɔyɔpú ngyi. ¹³ Ntɔ dé mlɪ háan? Tɔ́á

nəbwe mliṭə, mməbwe ɔpasua bámbátó gyí, mmesi iwɪ tswɪ mliṣu. Kókoli, mliṣikie mí!

¹⁴ Séi á, otse saasi ndəbweá néba mli wá á. Mméesba besi iwɪ tswɪ mliṣu, tsúfé mmedé tətə fité tsú mli wá. Mli onutó ndehián. Kebi tamatsú mu si wá akənkə, mu si tótsú mu wá akənkə. ¹⁵ Ibo mi ɔdweá néyintá tógyítá mbu mli su, si mí iwɪ féé kúráá há mli. Íniá nde mli dwe dɔbi alí á, ntogyi su ɔdweá mli mú mliṣu há mliṣú dɛdunkí?

¹⁶ Fíali mlulawun ání lélé, mmeba besi iwɪ tswɪ mliṣu, táme mliḍéblí mliaa, nofwifwí ansí. Ndepu ató tɔn mli omuá wá mli ɔnó. ¹⁷ Ɔkpa ɔmɔmɔsu? Nətsun ahá ámutú nəwa mli wá ámutə ɔkusu sísi mli lóó? ¹⁸ Bréá nokokóli Tito, nəwa mua aní pío Okristoyin amv mli wá mé, olebesisí mli? Ekekeke! Tsúfé agywun kule mía munyɔ anidəpubwé toku kule.

¹⁹ Fíali mliḍé mú tsu bré ánfutə féé mliaa, anidətóí púká iwɪ lé. Megyí alí ígyi. Akristofō anígyí, anidətóí Bulu ansító. Mí adwepú, anidé tógyító bwe púwá mli ɔwunlín.

²⁰ Tsúfé ifú de mí ání néba mliumésíe wankláán. Mú su mí asun blíhé bówə mli asutə. Fíali nóbətu itré, ɔnsipe, ɔbló, olu, ahásia, ahá iwɪ asúnblí, iwitsú pú abasuda mliṭə.

²¹ Nhíe nde ifú nya ání ní nebá unv á, mí Bulu ɔbétrá ba mi asi mli su. Nósu, tsúfé mliṭə aku mliumókúsi mli lakpan dada amv bwe, dámlí kluntə sí mbuatə, hakpanla pú ɔwólí laláhe amv.

13

Iklá Pú Ɔláda

¹ Otse saasi nebá mli wá á. Bulu asún ləblí ɔbéé, “Asa mliéha ɔku ipón á, mliṣu adansifo abanyó ntée abasá ɔnó.”

² Bréá nebá mli wá otse nyɔɔsi a, neda ahá ámutú bude lakpan bwe ámu féé ɔlá. Ntráa nde amóba aha tráhe féé ɔlá da, tsúfé ní nebá unv á, néhié bití amó isv. ³ Tsúfé mliḍékléá mlébi ání lélé Kristo détoí tɔn mliṣu. Kristo ɔwunlín ɔnó məkúba asi mliṭə. Mu túmi é ihíe tɔə mliṭə.

⁴ Ibo mótóá mu oyikpalíhesu lowu ilosuná ání alap̄on, táme séi á, otsie nkpa Bulu túmito. Bréá ania munyɔ anilóbwe kule a, anilóp̄on, táme séi ania munyɔ anitsie nkpa Bulu túmito. Mú anidép̄okpá mli ní.

⁵ Mliyɔ mli nwuntɔ ki beɛ, ahógyip̄u onutó mligyí? Mlikap̄u mli iw̄i ki beɛ, lélé Kristo Yesu bu mlitɔ? Mlilawun ání ɔbu mlitɔ? Ní mlumókúwun mu mlitɔ mú á, mómú megyí ahógyip̄u onutó mligyí. ⁶ Nahogyiá mléba bebi ání Kristo ahógyip̄u onutó anigyí. ⁷ Anidé Bulu kokóli aniaa, mlumátrá bwe lalaha kuku. Megyí alia ibósuná ání anigyí Kristo ahógyip̄u onutó su. Táme ní ahá budekú beɛ megyí Kristo ahógyip̄u onutó anigyí ó á, ɔhá mli mú amlibwe tóá ida ɔkpa. ⁸ Tsúfé aní mú anuméetalí kósú líí ɔnɔkwali asún ámusu, d̄un ání abéha mú ibóyɔ nkpá wule. ⁹ Ní aní mú aní ɔwunlín ɔnó laba asi, mli klé ulawá ɔnlun á, ansí bégyi aní. Tóá anidé Bulu kulí gyí, ɔhá amlilalu kínkíínkín, amludan Kristo hógyitɔ. ¹⁰ Íni s̄u nagyankpá nde ɔwuló ánti wanlín sísí mli, asa amba unu ní. Méni ní nebá á, mmóobotsu ibi mlisu. Tsúfé ndekléá nóp̄u túmi ámúb̄u aní Wíe lapóhá mí ámu búa mli amludan. Mmóɔp̄uyíntá mli.

¹¹ Apíó, itráhe a, ansí igyí mli. Mlib̄o mbódí amlilu kínkíínkín, amludan Kristo hógyitɔ. Mliwa aba ɔwunlín. Mli agywun ibwé kule, amlitsia iwilwiitɔ, méni Bulu ámúb̄u ɔɔɔwé aní, ɔtehá aní iwilwii amu obétsiá mlitɔ bré féé. Nehá mli itsiá gyágyágyá.

¹² Mliha aba itsiá, amlilata aba puta ɔdwesu.

Bulu ahá ámúb̄u bubu nfi ámu féé behá mli itsiá gyágyágyá.

¹³ Aní Wíe Yesu Kristo bualegyí, Bulu ɔdwe pú ɔhe Wankíhé kulebwe itsiá mli féésó.

Bulu ntam pɔpwe; Nkonya
New Testament in Nkonya (GH:nko:Nkonya)

copyright © 2010 Wycliffe Bible Translators, Inc.

Language: Nkonya

Translation by: Wycliffe Bible Translators, Inc.

Nkonya

nko

Ghana

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nkonya

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 13 Mar 2019 from source files dated 13 Mar 2019

01b09958-fa53-51d1-aae0-88c7e9302503